

# In sguard a l'istorgia da la cultura da bogns (part 1)

■ **La funtauna da San Murezzan, enchaschada en il temp da bronz tranter il 15avel ed il 14avel tschientaner a.C., è probablamain vegnida utilisada a medem temp per far bogns. I sa tractava d'ina chascha da laina radunda, isolada cun arschiglia, nunida cun bagnolas da lain ed objects da bronz cultics.** Tenor la tradiziun scritta en ils bogns da Buorm ils pli vegls: l'onni 535 menziunescha Cassiodor las aquae burmiae che derivan probablamain dal temp roman. Il 1336 ha il balneograf Petrus de Tussignano visità quests bogns ed ha scrit las famusas «Canones», nov reglas per far bogn ch'èn vegnidas observadas severamain durant tschientaners. In interess pli grond per la forza curativa da las funtaunas d'aua minerala è naschi pir cun l'u-

mamain frequentà da quel temp; sia aua sulfurica fitg aromatica vegniva stgaudada en ina chaldera. Il 1559 ha J. J. Hugelius, in balneograf da Basilea, descrit il «Fideris-Bad in Grawpüntem» sco funtauna fitg curativa ed adattada cunter mal il venter, disturbis da digestiun e mals da giugadiras (gutta). In studi pli exact da las funtaunas d'aua da sal da Scuol-Tarasp (emprima documentaziun 1369, fluriziun a partir da ca. 1830) furnescha Conrad Gessner il 1562 sco resultat da ses segiurn da cura dal 1561; el recumonda da far durant trais dis ina cura da baiver cun charnpiertg e paun fermamain ensalà. Betg cler è il lieu da la funtauna minerala a l'ur dal glatscher sur Pigniu, menziunada da Durich Chiampell en sia «Raetiae alpestris topografica descriptio» da ca. 1570; quella duai esser vegnida frequentada da numerus pilgrins. Las descripiuns posteriuras da bogns da cura han suandà per gronda part il schema da quellas dal 16avel tschientaner. Pir a partir dal 19avel tschientaner cumparan retschertgas exactas davart la cumposiziun da l'aua e sia forza curativa, publicitadas en «Heilquellen und Bäder im Kanton Graubünden» (1914), l'ovra da standard da Gustav Nussberger. Vers la fin dal 19avel tschientaner è vegnids serrads divers bogns frequentads stediain a ses temp, e l'Emprima Guerra mundiala ha mess in fin andetga al turissem classic da bogns. Fitg frequentads a sias uras eran ils bogns da Fadrein, Ganey/Sievgia, Fläsch e Friewis/Vaz Sut; bogns cun ina curta fluriziun èn stads Gianatsch, Brühl/Domat, Tusaun, Pigniu e Le Prese/Poschiavo.



Paracelsus ha descrit il 1535 divers bogns en il territori retic.

manissem e la renaschientscha en il 16avel tschientaner, ed i circulavan las emprimas descripiuns da bogns. Il 1535 ha il scienzià universal da Nossadunnaun, Paracelsus, visità ils bogns da Buorm, San Murezzan e Faveras ch'el ha descrit en sia «De morbis tartareis». El è l'emprim ch'ha relaschà notizias medicinalas davart las funtaunas d'aua minerala curativas da la Rezia grischuna. Il 1545 ha alura descrit Peter Paulus Paravicini, in medi da Com, ils bogns da Masino e da Buorm («De Masinensium et Burmensium Thermarum [...]). Masino vegniva frequentà intensivamain da la noblezza grischuna durant il 17avel e 18avel tschientaner. Il 1553 è cumpari en la collecziun da texts «De balneis» da Tommaso Giunta il tractat «De thermis Rheticis» dal medi Gulielmus Gratarolus che tracta però pli detagliadamain mo ils bogns da San Murezzan e dad Alvagni; menziunads a l'ur èn Vulpera/Scuol, Le Prese/Poschiavo ed in bogn (Madesimo?) al Munt Spleia. Il bogn d'Alvagni era fer-

ma charta da bogns odierna preschenta trais categorias da bogns: ils bogns classics da cura e las funtaunas d'aua minerala da Scuol-Tarasp-Vulpera, San Murezzan, Val e Cuira-Passugg, ils bogns da cura en la Val Sinestra/Sent, a Serneus, Andeer, Mustér ed Alvagni (reavertura 2001) e las funtaunas d'aua minerala a Bravuogn, Cuira-Sassal e Razén.

Sut l'aspect da la cumposiziun chemica èn da menziunar l'aua sulfurica dals bogns d'Alvagni, Serneus, Spinabad, Le Prese e Tarasp sco era l'aua da gip da Bravuogn, Ardez, Andeer, Silvaplana, Bogn Tenigia e Val. Funtaunas simplas d'aua da fier cun acid carbonic (ma senza arschiolettas) existan a Peiden, Razén, San Bernardin, Giuvaulta, Tumeigl, Solas, Casti e Mustér (era ferma funtauna da radon), veritablas funtaunas d'aua forta a San Murezzan, Scuol-Tarasp, Val Sinestra/Sent, Passugg, Cuira-Sassal e Fadrein.

D'implants per far bogn moderns e bain frequentads disponan Scuol, San



Ina part dals edifizis da cura da bogn a Tarasp-Vulpera. (1905).

Murezzan, Andeer e Val. La plipart da quels èn en possess da las vischnancas ed èn da grond'impurtanza economica era per il Grischun. Betg main impurtantas era las auas mineralas Passugg, Rhäzünser, Valser ed Allegra. *Martin Bundi*

## Gulielmus Gratarolus

\* 1516 a S. Giovanni Bianco (Lumbardia), † 1568 a Basilea. Studis da chemia e medischina a Padua, convertì al protestantissem. La fin dal 1548/entschatta dal 1550 è Gratarolus fugì da l'inquisiziun romana en il territori da las Trais Lias, nua ch'el è stà activ sco medi e perscrutader da bogns termals. Sias retschertgas da las funtaunas mineralas e dals bogns da cura dal Grischun èn preschentadas en l'ovra da Tommaso Giunta «De balneis» (1553) en ina contribuziun intitulada «De thermis Rhaeticis, et vallis Transchurii» che tracta oravant tut ils bogns d'Alvagni e da San Murezzan. A Basilea è el stà medi e publicist ed è vegni recepì burgais da la citad. *Martin Bundi*

## Conrad Gessner

\* 16 da mars 1516 a Turitg, † 13 da december 1565 a Turitg (da la pestilenza), reformà, figl dad Urs, pellitscher, e dad Agathe nata Frick. Studis a Bourges e Paris 1533–34, dr. med. a Basilea 1541, pratica da medi e professer d'istorgia naturala a Turitg. Scienzià universal da renum mundial; autur tranter auter da la «Bibliotheca universalis» (1545) e dal «Thesaurus Eponymii Philiatrici» (1552). Relevanta per il Grischun è sia contribuziun «De Germaniae et Helvetiae Thermais» en l'ovra da Tommaso Giunta «De balneis» (1553), cun la contribuziun dal medi Gulielmus Gratarolus, «De thermis Rheticis». Da ses segiurn curativ en il Grischun (1561) resultan studis pli exacts davart la funtauna minerala da San Murezzan, las funtaunas da sal da Scuol-Tarasp (Funtana Luzius) ed il bogn da Fadrein (skizza da l'implant da pumpadi). *Urs B. Leu*

## Gustav Nussberger

\* 2 da zercladur 1864 a Lenzburg/AG, † 5 da matg 1935 a Sent, reformà, da Lenzburg. Figl da Jakob, cusunz, e d'Elisabeth nata Laffeli. ∞ 1895 Agnes nata Bazzell, figlia da Domenic, da Sent. Gimnasi ad Aarau, studis da chemia, mineralogia e fisica a la SPF Turitg (in semester a Berna), dr. sc. nat. 1892 («Ueber stereoisomere Dioxime aus Acet- und Benzoylessigäther»). Magister a la Minerva a Zug ed a la Concordia a Turitg 1885–92, alura a la Scola chantunala a Cuira 1892–1932. Schef dal labor da chemia dal Grischun a partir dal 1909. Piunier da la fotografia Röntgen en il Grischun ed autoritad sin il champ da las funtaunas mineralas. Autur da 22 publicaziuns, numerus referats

en servetsch da la Societad grischuna per la perscrutaziun da la natira (SGN). Sia ovra da standard balneologica, iniziada suenter sia pensiun, è restada nunaccomplida. Tranter il 1906 ed il 1925 è Nussberger stà durant ogt onns president da la SGN (numnà commember d'onur). *Adolf Collenberg*

## St. Moritz (San Murezzan)

Il 1853 han ins scuvert durant lavurs da construcziun a San Murezzan Bagn in enchaschament d'aua da funtauna (funtauna da Mauritius), mess a la glich definitivamain en occasiun dal nov enchaschament da la funtauna il 1907. En la profunditad da 1,4 m èn ins urtà sin dus bischens da lain da laresch, installads en posiziun verticala. Ils bischens avevan in diameter da var 0,8–1,4 m ed in'auetezza da var 1,8–2,3 m ed eran per part emplenids cun belma. Els eran enramads da duas chaschas da lain rectangularas u trapezoidas. La chascha exteriura era vegnida realisada cun laina radunda (construcziun da bloc), quella interiura cun laina squadrada enchaschada (aissas). Il lain bain mantegnì mussava numerus fastizs da l'elavuraziun. In dals bischens cuntregneva divers objects da bronz, tranter auter duas spadas cun manetscha entira, in fragment d'ina loma da spada, ina loma da stilet ed ina gluva da decoraziun. Ils chats dateschan per part anc dal temp da bronz mesaun (ca. 15avel–14avel tschientaner a.C.), per part dentant gia da l'entschatta dal temp da bronz tardiv (ca. 13avel – 12avel tschientaner a.C.). Ils objects eran plazzads cun premura en il bischen da lain ed eran probablamain in'unfrenda ad in dieu da la funtauna. Tenor retschertgas dendrocronologicas pli recentas è vegnida enchaschada la funtauna cun gronda probabilitad il 1466 a.C.

Il 1537 ha menziunà Paracelsus per l'emprima giada ina funtauna curativa (aua forta) a San Murezzan. Dapi alura èn cumparidas nundumbraivlas descripiuns medicinalas e geograficas da la funtauna ascha. L'emprima analisa chemica da quella datescha dal 1674. En il 17avel e 18avel tschientaner vegniva ella frequentada oravant tut da curants talians (il duca da Parma e Savoia e.a.). In'emprima chasa da cura è vegnida averta il 1832 (anc senza ustaria, agiuntada pir il 1856). La chasa da cura, realisada il 1864 tenor ils plans da Felix Wilhelm Kubby, ha inizià il svilup da San Murezzan sco center da cura da bogns. La funtauna da Mauritius è vegnida enchaschada da nov en ils onns 1853, 1907 e 1937, quella da Paracelsus il 1853. Il nov center da bogns da cura è vegni terminà il 1976. *Jürg Rageth / Ottavio Clavuot*

## Tarasp-Vulpera

Las funtaunas d'aua minerala èn vegnidas perscrutadas da Paracelsus gia en il 16avel tschientaner. Cun la fundaziun da la Societad Tarasp-Scuol (1860) ha inizià l'epoca dal lieu da cura Tarasp-Vulpera. Il 1863 han ins vendì 27 000 buttiglias aua minerala. Gia il 1843 avev'ins costruì a Vulpera in hotel cun access a las funtaunas d'aua da sal, il 1864 han ins avvert il Grand Hotel Kurhaus ed il 1876 la bavetta a la riva da l'En. A la sava dal 20avel tschientaner èn vegnids erigids a Vulpera en stil floreal ils hotels Waldhaus (ars giu il 1989) e Schweizerhof sco era in bogn, ina halla da tennis, ina piazza da golf, villas ed in'ovra electrica. La rolla impurtanta da pioniers ha giugà la famiglia d'hoteliers Pinösch. Las funtaunas da sal da Glauber (natriumsulfat), Luzius ed Emerita, la funtauna d'aua ascha Bonifaziun e la funtauna d'aua d'atschal Carola èn daventadas fitg enconuschantas. En ils onns 1912–13 è vegnida costruìda ina chasa da bogns a Tarasp. En ils onns 1930 ha era Tarasp-Vulpera senti la crisa dal turissem balnear.

*Paul Eugen Grimm*


## Scuol

Enturn il 1860 han ins inizià l'explotaziun a l'engronda da las funtaunas mineralas, iniziand il vair temp dal turissem da bogns. En ils decennis suandants han ins erigì ina chasa da bogns e numerus hotels al stradun tranter las duas parts veglias da la vischnanca. Il Bogn Engiadina Scuol cun l'emprim bogn roman-irlandais da la Svizra ha fatg renascher il 1993 la tradiziun balneara.

*Paul Eugen Grimm*

## Val Sinestra

Las funtaunas mineralas da la Val Sinestra cuntregnan bier fier e vegnivan utilisadas gia en il temp medieval. Il 1898 han ins enchaschà sis funtaunas mineralas, auas aschas cun radium e bier arsen, numnadas dals indigens «auas fortas». L'emprima chasa da cura cun halla da baiver è vegnida costruìda il 1904, engrondiva il 1914 e complettada il 1959 cun novs implants da bogn. Ella era apprezzada fitg da pazients cun reumatismem. *Adolf Collenberg*



Placat per ils bogns d'aua da fier a San Murezzan (1885).

## Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.